

2. Ragab
Josua 2:1-24

VERWELKOMING:

5 MIN

YSBREKER:

25 MIN

- Wat is die gevaarlikste ding wat jy al in jou lewe gedoen het?
- Het 'n ander mens al jou lewe gered/gespaar? Vertel vir die ander.
- Wat weet jy van jou oumagrootjies? (Onthou, jy het 4!)

AANBIDDING:

5 MIN

Gee vir elkeen 'n papiertjie. Laat elkeen die name opskryf van die mense wat 'n groot invloed op hulle geloof gehad het (ouers, grootouers, vriende, ander mense). Gee dan kans vir stilgebed waar elkeen die Here kan dank vir daardie mense en hulle aan Hom kan opdra.

BYBELSTUDIE:

35 MIN

Lees Josua 2:1-24 deurdat elkeen een vers hardop lees.

- In vers 1 lees ons dat Ragab 'n prostituut was. Waarom gebruik die Here 'n prostituut om die spioene weg te steek?
- Ragab se verlede is vol sonde en tog staan dit nie in die pad van haar toekoms nie. Waarom is dit vir ons so moeilik om los te kom van dinge wat ons in die verlede verkeerd gedoen het? Hoe kan ons die verkeerde in ons verlede agter ons sit?
- Ragab – die PROSTITUUT – moes haar familie oortuig om by haar huis bymekaar te kom en daar te bly terwyl die Israëliete Jerigo inval. Sy moes hulle ook oortuig om haar nie aan die stadsowerheid uit te lewer nie! En tog het sy dit gedoen en dit reggekry (lees Josua 6:23). Hoekom was dit vir haar so belangrik? Dink julle dit was vir haar maklik? Is ons net so gestel oor mense se geestelike lewe as hulle fisiese lewe?
- Laat iemand Matteus 1:5-6 hardop lees. Ragab, die prostituut was Dawid se ouma-grootjie en een van Jesus se voorgeslagte. Wat beteken dit vir ons?
- Laat iemand anders Jakobus 2:24-26 hardop lees. Hoe moet ons dit verstaan? Wat kom eerste – geloof of daad?
- Hoe is Ragab 'n besondere vrou?

DIENSWERK:

5 MIN

Hoe kan julle werkers van die Here ondersteun?

Hoe kan julle die mense wat julle geloof gevorm het, bedank?

GEBEDSRIGLYN:

10 MIN

Waar is daar gestuurdes van die Here in 'vyandige' lande?

Waar word jy gestuur na 'n 'vyandige' plek?

Laat elkeen 'n lysie maak terwyl julle daaroor praat. Vat die lysies saam met julle en bid die heel week daarvoor.

Vra nou vir een persoon om namens julle te bid na aanleiding van vandag se byeenkoms. Waarvoor moet sy/hy bid?

ADMINISTRASIE:

5 MIN
